

Miscelanea

Xantar participou na presentación da campaña turística de Ponte de Lima

Xantar participou como convidado especial na presentación da campaña turística “Em época Baixa, Ponte de Lima em Alta” para a tempada 2017/2018. Inclúe a organización de 13 eventos ata o 20 de maio de 2018. Son feiras especializadas nas potencialidades do territorio que se celebrarán en distintos fins de semana e que, en palabras do presidente da cámara municipal de Ponte de Lima, Vitor Mendes, “teñen a previsión de xerar un retorno directo na nosa economía de catro millóns de euros e atraer a máis de 300.000 visitantes”.

Durante este acto foi presentada a próxima edición de Xantar na que Ponte de Lima xa confirmou a súa participación a través dunha caseta promocional, dun restaurante e dun día dedicado. Motivos profesionais provocaron a ausencia do director de Xantar, Alejandro Rubín, neste importante acto aínda que estivo presente a través dun vídeo que se proxectou neste acto e no que

convidou os asistentes a visitar a próxima edición e fixo un repaso polos bos resultados que está a dar a intensa relación de cooperación transfronteiriza existente entre a Fundación Expourense e a Cámara Municipal de Ponte de Lima”.

Nesta presentación á que acudiron representantes institucionais, empresariais e numerosos medios de comunicación, Vitor Mendes, declarou que “a relación de cooperación transfronteiriza da Eurorrexión Norte de Portugal - Galicia é perfecta e está a ser fundamental para dinamizar o turismo de proximidade da nosa cidade. Desde que participamos en Xantar somos conscientes do importante que é organizar eventos que poñan en valor os produtos endóxenos e de excelencia do noso territorio vendo como a través deles dinamizamos a economía local; e é que participar nunha cita internacional como Xantar supuxo unha oportunidade para darnos a coñecer a nivel nacional e internacional e Ourense é nosa mellor porta de

entrada para o mercado galego, que é o mercado internacional máis próximo a nós”.

A nova campaña turística “Em época baixa, Ponte de Lima em Alta 2017/2018” ten como principal obxectivo desestacionalizar o turismo de proximidade na cidade atraendo turistas desde novembro a maio a través da organización de 13 feiras diferentes que se celebrarán durante os fins de semana. “Serán 13 feiras máis unha, xa que consideramos a Xantar como un evento común”, indicou o alcalde. E é que no seu calendario inclúen a semana de Xantar, para que nesta ocasión sexan os veciños de Ponte de Lima os que visiten Ourense. Pola súa banda, o salón internacional promocionábase en todas as accións que a cámara municipal promova relacionada coa gastronomía como son a feira do bacallau e a repostería ou a das delicias de sarrabulho.

Tendo en conta a localización estratéxica de Ponte de Lima, a vila máis antiga de Portugal, si-



Vitor Mendes, Silvia Pardo e Pablo Sousa, concelleiro de turismo de Ponte de Lima.

tuada no epicentro da Euro-Rexión Norte de Portugal- Galicia, é o destino de moitos visitantes que atopan nesta cidade unha ampla oferta turística desde a gastronomía, o viño, o patrimonio histórico e paisaxístico, o deporte, a natureza ecuestre ou o comercio tradicional.

Calendario de feiras

Estes eventos servirán para inaugurar o novo recinto feiral de Ponte de Lima e que supuxo un investimento superior aos 3,5 millóns de euros. VI Festa da Xente Miúda e Feira Infantil: 24 ao 26 de novembro. VII Feira do Ambiente e Enerxía: 1 a 3 de decembro. VII Festival do Bacalhau e

Doçaria: 8 a 10 de decembro. XI Verde Noivos: 6 e 7 de xaneiro de 2018. X Feira do Porco e das Delicias do Sarrabulho: 26 ao 28 de xaneiro. III Feira 100% Agrolimiano: 10 e 11 de febreiro. IV Expo Saúde e Social: 23 ao 25 de febreiro. X Feira da Caça, Pesca e Lazer: 9 ao 11 de marzo. V Feira Gastronómica a Lampreia / I Feira da Cerveja Artesanal: 23 a 25 de marzo. IV Feira dos Jardíns e Espazos Verdes: 14 e 15 de abril. II Expo Canina Internacional/ III Expo Internacional de Gatos: 28 e 29 de abril. III Festival da Carne Minhota: 11 ao 13 de maio. II Feira da Educación, Ciéncia e Tecnoloxía: 18 ao 20 de maio.

O Monte Santa Trega acolleu o IV Trail do Trega con preto de 300 participantes

A Guarda acolleu o pasado domingo, 26 de novembro, a cuarta edición da proba deportiva Trail do Trega. Preto de 300 persoas participaron na carreira pedestre e a andaina, que transcorreron polo Monte Santa Trega e a súa contorna.

Namentres as preto de 70 persoas participantes na andaina comezaron o seu percorrido ás 9:15 horas, a carreira cronometrada comezou puntualmente ás 10:00 horas, partindo da explanada do Centro Cultural.

O oiense Antonio Liébanas conseguiu percorrer os 18,5 km da proba, con preto de 1.100 metros de desnivel acumulado, en pouco menos de 1h52'14", proclamándose como campión absoluto entre os máis de 220 participantes. Poucos segundos despois, acadou a meta o vigués Alberto Iglesias (1h52'32") e, trancorridos 1h54'09" do inicio, fíxoo o redon-

delado José Luis Dorado.

Na categoría feminina, conseguiron os mellores tempos a tudense María Jesús Fernández (2h32'55"), e as viguesas Elena Pérez e Isabel González, que cruzaron a liña de meta nesta orde e con poucos segundos de diferenza (2h36'35" e 2h36'54").

Tamén obtiveron recoñecemento os tres guardeses co mellor resultado. Así, Josué Moreno (2h05'34"), Antolín Martínez

(2h10'44") e Javier González (2h13'27") recibiron un trofeo da man da concelleira de Sanidade e Servizos Sociais, Teresa Vicente, e o concelleiro de Deportes e Patrimonio, Javier Crespo. María Dolores González, pola súa parte, foi a única guardesa participante (3h04'33").

Na categoría Sénior masculina (participantes de entre 18 e 34 anos) acadaron os mellores tempos David Alonso (1h55'02"), o



oiense Iván Pimentel (1h56'42") e Ángel Álvarez (2h02'42"). Na feminina, pola súa parte, obtiveron recoñecemento Natalia Sierpes (2h40'28"), Patricia Pereira (3h23'20") e Nerea González (4h02'12").

Na categoría Veteranas A (participantes de entre 35 e 44 anos), os mellores tempos foron os conseguidos por Elena Pérez, Isabel González e a viguesa Susana Álvarez (2h49'06"), namentres na categoría masculina estes coincidiron íntegramente cos gañadores absolutos da carreira.

Na categoría Veteranos B (a partir de 45 anos), os mellores

resultados foron os obtivos polo vigués Miguel Dorado (1h56'58"), o redondelano Gonzalo Rodríguez (1h58'54") e Fran Blanco (2h02'17") de Boiro, respectivamente. Na categoría feminina, pola súa parte, estas foron María Jesús Fernández, Isabel Cunha (2h38'25") procedente de Vilanova de Cerveira, e a porriñesa Irene Sobreira (2h56'03").

O evento deportivo, que transcorreu sen incidencias, foi organizado por TimeAdventure en colaboración co Concello da Guarda, a Deputación de Pontevedra e a Comunidade de Montes da Guarda.